



## Imbressjone auserm Ordsdgschehe


\*erlebt unn uffgschriwwe vumm Walter Rupp\*

Seidem ledschde Gebabbelheft iss jo schunn widder enn Haufe Wasser die Isenach nunner geloffe unn in Flomerschemm iss so manches bassiert.

Im Ogdoower hott unsern neije Ordsvorschedeher die Amtsgschäfte iwvernumme. Dass dess a e Gnocheärwett soi kann, hodder dann glei im November zu schbiere griggt, wie er beim TuS e Fass Bier hott aschdegge misse. Do war nämlich de Boggbierufftakt vunn de Bellemer Brauerei mit Mussig, mit me Kabbareddischt aus Deidesem unn mit Bier bis zum Abwinke. Am kalde Biffee hänn dann die Promminende uns gewöhnliche Fußvolk schäh in ähner Reih gschdanne unn hänn gewaad, bisse drakumme sinn. Dess nenn isch "gelebdie" Demmogradie.

Am 6. Dezember war, wie alle Johr, de Flomerschummer Weihnachtmarkt uffem Brogramm. Ferr die Ausschedeller wars dessmool kä roinie Frääd, weil so eeglisches Wedder war. Am Samsdaag beim Uffbau issemool glei unsern Pawilljon wie enn große Drache uffs Dach vunn de Zwiwwelböck ehre Holzbuud gseegelt unn ausnannergebroche. An alle Seide sinn die Schdange runnergerasselt. Am negschde Moje hott dann e Zelt vunn de Grundschool die Bää in die Luft gschdreggt. Irgendwann war dann awwer alles gebändischt, feschedgegnibbelt unn beschweert unn wie die erschde Besucher kumme sinn, warn die Schdänd all oigerahmt unn gschmiggt. De ganze Daag war dann weddermässisch dauernd wass los: De Wind hott gebloose, die Sunn hott a mool korz gschoint, e Schneedreiwie iss iwver de Kerweblatt gfeegt - mit ähm Word, 's war kalt unn ugemiedlich. Unn drotzdem hänn am zwää, bei de Eröffnung, de Ortsvorschedeher Dr. Gerhard Bruder unn de AGF-Vorsitzende Rainer Hannemann enn Haufe Leid begrieße könne. Die Kinner vunn de Mussigschool hänn in die Drummbeede gebloose wie die Weldmääschder unn die vunn de Grundschool hänn gsunge unn Gedichte vorgedraage. Dodenoh hott de AGF-Schäff dann dess Greizwordrätsel vumm 6. Gebabbelheft uffgeleest. Do waren jo tatsächlich ähnefuchzisch rischdische Leesunge in de Losdrummel. Manche hänn sogar schääne Kaade verwendet unn ah

noch e bissel wass dezugschriwwe unn gemoolt ; so wie z. B..die Pia Bracht:  
"Juhu ! Do glotzener, gell ? Meer sinn nämlisch widder druffkumme , uff dess  
Leeseungsworrd. Es hott uns viel Schwääß  
gekoscht bis merr des "BAGGOWNEDEER" - le  
rausghatt hänn. Meer frän uns schunn uffs 7. Ge-  
babbel. Weider so. Gruß vunn de 3 Derkemer !!!"



Na, iss dess nit goldisch ???

Wie dann die Miß Schdrohhut die Gewinner gezooge hott, waremer all blatt: De  
erschde Preis iss an die Familie Mannweiler gange, die beim Rädsel auserm 3.  
Gebabbel schunn de dritdde unn de zwädde Preis ergattert hänn. Do sieht merr  
mool, dass sich dess Mitmache lohnt.

Bei de Griene im Zelt war dann ferr die Kinner e Dia-Märcheschdunn agsaat  
unn enn Zauberer hott soi Kunscht vorgfieht.

Gege die eisisch Kellt hotts uffem ganze Blatz allerhand Uffwärmer gewwe,  
vunn de Subbe bis zum Schnaps. Isch hab misch mit're hääße, feirische  
Gulaschsupp widder uffgetaut. De leere Deller hab isch dann zum MGV  
gebrocht unn im Kuhne Peder e Lob ausgeschbroche, ferr dess foine Sibbel.  
"Dess iss die selb wie ledschdes Jahr" secht do druff de Peder, awwer de Gerd  
Frerichs setzt glei degeje " Das stimmt aber nicht, das ist doch nicht die alte  
vom vorigen Jahr, wir kochen doch jedes Jahr 'ne neue Suppel" (uff Pälzisch  
kanners noch nit so rischdisch).

Wies dann dunkel worre iss unn die Lischder gschdraht hänn, hammer uns all  
gfräät, dass so viel Besucher do waren. Unn wie merr gsehe hänn, dass die  
Leid sich ah all fräen, do waren die Mieh unn die Ärwett unn die lange  
Vorbereidunge vergesse. Eigentlich sinn jo bei uns nit viel Adragzione zu  
bewunnre. Annre Woihnachtsmärkt in de Umgebung hänn do nadierlich mäh  
zu biede. Unn drotzdem kummen die Leit gern doher, weil merr hier ebbes  
hänn, wasses in Mannem, in Mischelschdadt odder in Nirnberg nit gibt: Die  
Gsellschaft. Merr driff Bekannde, die merr schunn lang nimmi gsehe hott,  
verabredt sich mit Freunde odder drinkt mit de Nachberschaft enn Glihwoi.  
Dess älläh isses doch schunn wert, dass merr enn Woihnachtsmarkt  
veraschdalden.

Im Dezember hott endlich enn neije Subbermarkt bei uns uffgemacht.  
Hoffendlich gehen diejenische, wu immer geglaagt hänn, dass merr känner  
hedden, ah dohie zum Oikaafe, dass uns ah lang erhalde bleibt.

De 1. Januar hott uns de "EURO" bescheert. Dess war e bissel uhoimlich,  
weil merr gewisst hott dass do iss, awwer gsehe hott merrn nit. Dess dauert  
halt noch e zeitlang bis merrn in de Händ hänn. In de Zwischezeit kämmer uns  
jo schunnemool mit de neije Schbrooch verdraut mache. Wann die "Mark"  
wegfallt, missemmer halt "Euro" saage. Beim Metzger verlange merr dann  
"Euroknoche" wammer e "Euroknochesibbche" koche wollen, zu de Mark  
Brandenburg missmer jetzt Euro Brandenburg saage unn unser aldes  
Schbrichwordd hääßt jetzt: "Meer fahrt de Schreck durch Euro unn Bää". Merr  
werrn uns dra gewähne.

Am 10. Januar war Bürgerempfang vumm neije Ordsvorschdeher unn de Zwiwwelböck. Do war vielleicht wass los. Die TuS-Hall war gschdobbdevoll. De Dr. Bruder hott enn Riggblig iwwer's Weltgschehe vumm ledschde Jahr gemacht; dess alde Jahr war jo voller Kadaschdroofe unn Griege. Do wars in Flomerschemm schunn e bissel friedlicher, drotz demm Theader um dess Ordsvorschdeheramt. Der Bau vumm Reje-rigghaldebegge hett sich gelohnt, weils seitdem kann Wolgebruch mäh gewwe hett. Dann iss en liewe Mensch geehrt worre, der zwar in Ebbschdää wohnt, awwer in Flomerschemm agdiev iss, sozusage enn "Flo-schdääner". Dess war de Rainer Hannemann, unsern Schäff vunn de AGF, der sich schunn seit Johre ferr unsern Ord gewaldisch oisetzt. De Dr. Bruder unn de Wirthe Walter hännem sogar noch e Schdändche gebrocht.

Dann hänn die Zwiwwelbegg die Macht im Ord iwvernumme unn die Ordsverwaltung in die Wieschd gschiggt. De Peter Kraus hott de Ordsvorschdeher gelobt, der jo noch nit lang im Amt weer unn drumm ah noch nix kabuttgemacht hett. De Dr. Bruder hott dann die Wutz auserm Sagg gelosst unn hott verkündt, dass vor langer Zeit in Flomerschemm schunn enn Zwiwwelkäänisch regiert hott. Belegt war dess ganze durch enn Fund in unsrer Gemargung: E Schatztruh mit re goldne Zwiwwelbock-Kroon unn re schwere Zwiwwelkett, sowie ähnre ladeinische Bedienungsoleidung. De Peter Kraus iss dann sofort als legidiemer Noochfolger zum Käänisch "Peter de Erschde" gekiert worre unn hott sich glei in soim neije Glanz huldische losse. Dann hänn die Zwiwwelbock-Gardemädcher ehr Bääscher gschwunge, wie wannse se wegschmeiße wollden unn zwischennoi hott die flott-fetzisch Flomerschummer-Jung-Mussigg-Bänd "The Kingbees" (uff Flomerschmerrisch sinn dess "Die Käänischs-Biene") die Tus-Hall ziddre losse wie sellemools in Jericho. Unn wie's Gewidder war mool widder enn schääne Sunndaag-Middag vorbei.

Dann iss die Fasnacht kumme, unn weil isch do kä Ahnung devunn hab, schreibt jetzt dodriwwer unser Experddin Christl Müller.

Ferr rischdische Kamewallischde geht die fünfd Jahreszeit jo schunn am 11.11. los; unn so sinn die Zwiwwelbegg ah glei am Samsdaag druff middre furiose Ereffnung närrisch in die nei Kampanje gschdardd. Die Turnhall war voll, merr hott gemerget, dasses es langie Zeid seit Aschermiddwoch war. Als wolldense beweise, dasses noch feire können, hänn die Narre bis zum frieje Moje



getagt, um dann ferr de Reschd vumm Johr in die besinnlich Zeid abzutauche.

Im Januar, glei nochem Neijahrsempfang, wu de Rubbe Walder jo schunn so ausfiehrlisch driwwer gschriwwer hott, isses dann rischdisch losgange. Die Elfer-räät sinn in alle Himmelsrischdunge ausgeschwärmt unn hänn Flomerschemm bei de auswärdische Veroine würdisch verdrehde.

In ganz besondere Termin war dodebei im Mannemer-Eichbaum-Bräukeller. An demm Daag iss de Zwiwwel-Owwerbogg, de Rolf Miller, ferr soi Verdienschde um die Fasnacht vunn de Badisch-Pälzische Owwermäsker middem große Verdienschd-Orde (in Silber) vumm "BDK" dekoriert worre. Denn hodder sich in denne ganze Johre ah werglich verdient! Iwwerschens iss de Rolf ah schunn durch die Schadtverwaltung im Ogdoower, dortmools zusamme middem Udo Böhm, mit de Ehrenoodel vunn de Schdadt Frankedahl ausgezeichnet worre. De Udo hott soi Auszeichnung ferr sein hegerische Oisatz in de Jagdgesellschaft griggt.

Zurigg zu de Fasnacht, die Zeid war jo korz genug. De negschde Großkampftaag war dann 's Ordensfescht. Die TuS-Hall war bis uff de ledschde Blatz besetzt. Disch unn Schdiel aus de Werdtschaft hänn noch roigschafft werre misse. Drot denne viele Abordnunge, die aus Noh unn Fern zum Ordensdauach kumme sinn, wars ganz korzweilisch, äfach schää. Die Gardemädscher, vunn de Glännschde bis zu de Große, hänn zum erschde mool ehre Schaudanz gezeigt. Dodefor hott 's viel Beifall gewwe; die Schdimmung war subber. Der ganze Zauber iss gange bis weid nooch Middernacht. Wie die Kabell dann Feierowend gemacht hott, sinn die Gäscht all in die Zwiwwelbar oigfalle unn hänn die zwää Barkieber, de Ronald Schmiiedhofer unn de Thomas Barth, mit ehre beliebte unn immer neije Coggdääls ganz schäh zum Schwitze gebrocht. Manche hedden gärn uff die Mussigg noch e bisschen mim Bobbes gewaggelt, awwer dodefor war iwwerhaupt känn Blatz mäh.

Jetzt schdehen die Brunksitzunge uff de Daagesordnung. Die erschde war am Freidaagowend. Viel ertlische unn schdädtische Brominenz war debei. Isch wääß nit, an wasses geläage hott, awwer jedenfalls iss känn rischdische Funke riwwergschbrunge. Am Brogramm allää kanns eigentlich ah nit gelege hawwe, dass die Schdimmung so verhalde war; wahrscheinlich iss merr Freidaags, so korz noochem Schaffe halt noch so agschbannt odder nied. Samsdaags hänn alle Agdieve die Kebb hänge losse; awwer dess hott sich glei geännert. Schunn

beim Oimarsch sinn die Leid vunn ehre Blätz uffgschdiehe unn hänn die Agdöore mit laudem Glatsche empfangen. 'S Bubliggumm war in Hochform unn Sunndaags bei de Seniore wars genau so, merr hedd könne mähne, 's weren ganz verschiedene Veraschdaldunge gewäss.

In demm Zeidungskommendar vunn de "Rhoipalz-Redakteuse" (eva) Klag-Ritz, sie



war Freidaags doo, hott schbeeder gschdanne: ...zum Glogg iss Flomerschemm nit iwweeraal !!! Isch hab Verschdändnis devor, dass dere guude Fraa der Beidraag mit denne gfärbde Unnerhosse e bissel zu derb unn gschmagglos ausgfalle iss, awwer sie sollt vielleicht mool driwwer noochdenke, ob ihr in ehm Lääwe nit ah de äh odder annre Beidraag in die "Hosse gange" iss.

Awwer desshalb glei enn ganze Veroin odder de ganze Vorort (je noochdeem wie merr sieht) zu verreise, iss enn recht scharke Duwwagg.

Dodenoh wars Zeid, sich ferr de Umzug in Frankedaal vorzubereide. Bis an Fasnacht-Samsdaag iss noch kräfdisch an de Umzugswägge gschafft worre. Alle Veroine gewwen sich die grescht Mieh, duen wass se kennen - unn Geld derfs ah nit viel koschde. Do werdd awwer ah bloß rummgemault, do heert merr bloß: Dess iss nix unn dess iss nix! Unn wammer sich iwwerleegt, dass die Grutze, hauptsächlich in e Auguschd-Bebel-Schdrooß, die Zwiwwle ganz gefährlich zuriggschmeißen, do kammer sich schunn mool Gedanke mache, wie's weidergeht. Beim Dergemer Umzuug degeje, hänn sich die Leit iwwer die Flomerscher Zwiwwle gfräat unn kä ähznischie iss zurigg gflooge kumme.

Am Fasnacht-Samsdaag-Owend hott die AGF dann ehm jährliche Masgebäll in de Turnhall durchgezooge. De Rainer Hannemann unn de Wirdhe Walder hänn widder alle Regischder gezooge, um dess masgierde Volk uff Drabb zu bringe. Schaad, dass so wennisch Masge do waren. Wammer dra denkt, wie die Hall bei de erschde zwää Masgebäll, vor ca. 10 Jahr, faschd aus alle Neht geblatzt iss ....

Sunndaags-Middags hotts dann beim Kinner-Masge-Ball vumm TuS ferr die Glääne ah widder reichlich Gelegenheit zum Doowe gewwe. Die sinn jo do ganz außer Rand unn Band.

Wammer vunn Fasnacht im Vorord redd, derf merr nadierlich ah nit die Sängerfasnacht vumm "Bund Freundschaft" unn dess närrische Dreiwe im Tennis-Clubhaus vergesse, do geht nämlich ah als gewaldisch die Poschd ab.

Korz nooch Aschermiddwoch iss dann die Fasnacht beim Heringesse beerdischt worre. Die Ordsverwaltung, in Person vunn unserm Ordsvorschdeher Dogder Bruder, hott die Amtsgewald widder iwvernumme. Die drauernde Agdieve sinn mit de Fasnacht im Kerzeschoi durch de Saal uff die Biehn gezooge. Nooch de Drauerredd war dann die Fasnacht 1998/99 endgildisch erledischt.

Isch frää misch schunn widder uffs negschde Jahr; do hämmer dann die Schdadschlüssel-Brinzässin im Vorord.

-- Unn dass ah in de Zeid nooch de Fasnacht in Flomerschemm kä Wakuurn herrscht, beweist uns jetzt de Anton Pollich:

Kaum sinn an Silwescher die Rageede verglieht, die Sektflasche leer gedrunke unn viel guude Wunsch am Neijohrsempfang ausgedauscht worre, unn noch bevor die Schneegleggscher bliehen, do fangt schunn die Zeid a, wo die Veroinsvorschdänd die Jahresversammlung oiberufen. Wammer dann in de folgende Woche in e Werdtschaft odder bloß ins Derfl geht, do heert merr immer widder die



Frooge: "Na unn - iss alles beim Guude gebliwwe? Machen e paar jüngere Leit mit? Laaft Alles weider? Hots känn Durchnanner gewwe?". Als Mitglied vunn emm Veroiin frääts ähm dann immer widder, wann nit nor im eigene Veroiin, sondern ah in de annre Veroine Ruh, Änischkeit unn Gemeinsinn vorhande sinn.

Sinn die Oschderglogge verbleiht, die Maigleggscher riechen iwweeraal unn die Daage werren wärmer unn länger, gehts in Flomerschemm mit de Veroinsfeschdlscher los. Jeder Veroinsvorschdand frääts sich, wannen dann ah die Mitglieder vunn annre Veroine begrieße derf. E besondrie Frääd isses, wammer uff denne Feschde ah mit e paar frisch Zugezogene (sog. Neibirger) iwwe Flomerschemm babble kann.

De Hehepunkt iss awwer unser Kerwe im Augusd. In demm Jahr sinn die "Zwiwwelböck" die Gaschdgeber. Schäh iss dodebei, dass die Mitglieder vunn de AGF (dess sinn alle Flomerschummer Veroine) demm Veroiin, der die Kerwe ausricht, gräftisch unner die Ärm greifen. Viel Gäscht aus Flomerschemm, Ebbschdää, Frankedahl unn aus de Umgäwung kummen gern unn oft uff die Flomerschummer Kerwe. "Wenn man so recht bedenkt, liebe Leser" isses doch schaad, dass Flomerschemm nit iwweeraal iss !!!

## DIE SCHDAMMDISCH-BRIEDER

*Die Gschicht, ehr Leit, iss wirklich wahr, sie iss bassiert vor 60 Jahr:*

De Heinrich unn de Franz waren aldoigsessne Schdammdischbrieder. Alle Owend hännse beisamme in de Wertschaft ghoggt. Dess hott im Heinrich soiner Fraa iwverhaubt nit gebasst. Sie war dann efders daagelang bees unn hott mit ehre guude Mannsschdigg kä Wort geredd. Do hot sich de Heinrich was oifalle losse. Er sescht zu soim Kumbel: "Franz, du gehschd mit märr hääm, du wärscht sehe, heit owend redd se widder mit merr".

Gsaat - gedaa. Die Zwää gehen hääm - unn wie immer, em Heinrich soi Fraa redd kää Wort. Moin guude Heinrich geht an de Schrank, zieht die Schubblaad uff unn schmeißt die ganz Wesch raus. Dann kummt die zwätt unn die dritt Schubblaad dra. Uff ämool ruft die guud Fraa: "Ei Heinrich, wass machschde dann do???" Der saat do druff ganz gelasse: "**Isch hab doi Maul gsucht unn ääwe hab ischs gfunne**".  
(Vunnre anonyme Flomerschummer Leserin)



# De erschde Mehdräscher im Dorf - 2. Epos

....e annermool iss de Mayers Oddl mit soim Mehdräscher ausem Schdudremmer Weg kumme unn wollt dann in Richtung Falder unn weider in de "Lange Haane". Am Bahniwwergang hodder halde misse, weil grad enn Arweiderzug oigfahre iss. De Mayer hott deswesche e Mordswut im Bauch ghatt. Dess war im Polschder soi Schdunn! Die Schranke hodder schnell runnergedreht, vorm Oddl soim Mehdräscher; gegrint hodder, de Polschder mit soine Peif, die ewisch zwische de Baggezäh oigeglemmt war. Vumm Mehdräscher hot merris bis riwwer ghert: "*Dess Aaschloch, dess dumme!*" - doch dem Polschder soi Fell war digg, die unn anre Schbrisch hodder all schunn gekännt.

Meer hänn grad vorm Bahnhofs-Aabee Fußball gschbielt. Dess Schdigg zwische Weschkischdeer unn Aabeedeer war's Gool, de Glosehegger war de Goolmann. De Lebbes, de Fibs, de Bense Hugges unn noch e paar anre vunn de Unnergass hänn innerlich gekocht, weil se nit mitmache gedirft hänn. Meer hänn all mim linke Fuß gekiggt, weil merr owends de reschde Schuh hänn vorzeige misse. Die Gobbernaas odder Endemajor genennt, hott uff de Drepp vunn de Bahnhofswertschaft ghoggt. Er hott gemänt, er mißt uns dauernd sage, wie merr Fußball schbielt. Dodefor hämmer Gobernaas gerufe unn noch fresch gelacht.

*"Eisch dreht isch an de Aasch, wann isch niwwer kumm"*, hodder gerufe. Ob ers gemacht hett? Nää-; de Hans war viel zu gutmiedisch unn dann iss jo ah grad de Lebbes ums Egg kumme. Grad, uffrecht unn nit besoffe unn doch hodder die Hand ghowe, die Finger gschbreizt unn durchs uffene Fenschder nooch'rem Schdoin Bier gerufe. Meer hänn uns dann ah dezugschdellet, weils do immer was zu lache gewwe hott, zumool grad die ganze Arweider ausem Bahnhof kumme sinn. Die schwarze, gniddrische Dasche mit dem Essekönnche unn de Blech-Broddoos hänn se gschlenkert unn sinn in 3 Richtunge geloffe. Die Eisebahnschdroß nunner in Richtung Falder, in die Ebbschdääner Schdroß, de Reschd in die Haardt-schdroß, zum TuS in die Jahnschdroß (Klääfeld) unn dann noch die Ebbschdääner, die hänn awwer an de Schranke noch waade misse. Wie se dann hochgekurwelt worre sinn, iss de Mayer glei losgfahre mit soim Mehdräscher, hott in mordsmäßische Schdaab gemacht, weil der ganze Dregg uff demm holbrische Bahniwwergang runnergfalle iss. *"Saukerl!"* unn noch schlimmere Worde sinn zum Oddl gerufe worre vunn denne Ebbschdääner Arweider (Kohlebrogge), awwer dess hodder bei dem Grach nit ghert. Em Mayer soi Lache war ah nit zu heere, awwer die weiße Zäh aus dem schdaawische Gsicht hänn alles gsaat. Wie dann der Mehdräscher an uns vorbeigfahre iss, hodd de Lebbes zum Gobber gsaat: *"Bring doi Nas in Sicherheit, sunscht kannscht'se hinne im Schdrohbooße suche"*. E bissel hott sich de Hans doch geärgert unn hott ah glei Kontra gewwe. Dann hodder uns verzeht, wie de Lebbes vollgsoffe war unn soi Fraa hodden middem Handwäggele an de Bahnhofswertschaft abhole misse; doch dess iss widder e anri Gschicht.....


Gruß vunn demm eschde Flomerschummer D. F.

(Lieber D.F. - Immer Bleischdift unn Babier mit ins Bedd nämme, dass jo känn Gedanke verlore geht; meer sinn schunn gschbannt uff die Fortsetzung - die Red.)

## Liewe Rädselfreunde!

Jedzd iss widder der Zeidpunkt kumme, wu Ehr zeige kennnd, dassner de pälzische Dialeggd beschdens beherrschen. Unser heidischie Uffgaab schdellid Eisch beschdimmd nit vor uuleesbare Brobleme. Unn wass dess Leesungsword beschreibd, iss jeder vunn uns schunn emool gewessd - manche vielleicht sogar schunn eiders.

Es gibt ah dessmool widder ferr drei Gewinner e paar Fläschelscher AGF-Seggd.



### Im Gebabelhefd Nr. 6 waren die gsuchde Begriffe:

1 = GRUMBEERE, 2 = SAUSCHDALL, 3 = GRIMMLE; 4 = DREGGSAGG, 5 = ZODDELBOGG, 6 = WANZE; 7 = HAWWER, 8 = EBBSCHDAENER, 9 = SUDELWEDDER, 10 = SIMBEL, 11 = BOBBESCHEES, 12 = PUHLGRAWE

### Die Leesung war:



's werdd immer besser, dessmool sinn immerhie 51 rischdische Leesunge abgewwe worre.

### Gewunne hänn:

- 6 Flasche AGF-Seggd - Klaus Mannweiler vunn hier
- 4 Flasche AGF-Seggd - Günther Schimmel, ah vunn doo
- 2 Flasche AGF-Seggd - Harald Steffan aus Frankedahl


\* Wer widder nix gewunne hott, kann sich vielleicht mit demm Schbrichwort dröschde: Bäschveggel sinn die ähnzigscht Voggelart, die niemools ausschdirbt \*



Flomerschummer

# Waagrechdrädsel

midd Zickzack - Leesung



Ä = 1 Buchstabe

**Dess sinn die Frooche:**

1 = kleiner Kerl; 2 = Haarges zwischen spreken und riechen; 3 = Weihnachtsgansfüller; 4 = ungeliebte Lampendekoration; 5 = erstes Trainingsgerät für spätere Bierkrugstemmer; 6 = Beruhigungsapparat für Paket in Nr. 11; 7 = Nachwuchs eines Wetterpropheten; 8 = Kreuzung aus männl. Zuchtrind und großem Hund; 9 = nicht gut sehend; 10 = angetrockneter Schmutz; 11 = zappelndes Schnabelpaket für weißen Flieger; 12 = Flüssigkeitsspender für Bettlägerige; 13 = Schimmel der sich nicht reiten läßt; 14 = schmiegt sich eng an die Süße

Dess **Leesungsword** in denne unnerleggde Felder vunn owwe nunnerzuus geleese ( Pfeil ), kender widder uff e Bläddsche Babbier schreiw un beis Ruppe in de Briefkaschde in de Fränsemer Schdroos 107 bis schbädschdens 22. Auguschd noischmeise.

Fiehl Schbass !



# Unser schönes Brodbeidelfeschd 1998

Also, wann misch jemand frooge deht: "Was isses gemiedligschde Feschdel in unserm Ort?", do deht isch gladd saage: "Unser Brodbeidelfeschd!". Unn wanner dann weider frooge deht: "Uff wellem Flomerschummer Feschd sinn die wennigschde Leit?", dann deht isch saage: "Uff unserm Brodbeidelfeschd!". Unn wanner dann frooge deht: "Warum iss dann dess es schänschde Feschd?", dann deht isch saage: "Drumm!" - awwer misch froogt jo känner.

Ferr all die Leit, dies nit kennen, muss isch mool kurz erkläre, wass dess Brodbeidelfeschd eigentlich iss. Dess e ganz äfachi Sach: Jeder Besucher bringt wass vunn dehääm zum Esse mit - neie Woi gibts ausem große Fass. Dess iss schunn Alles. Genau so wars ah im ledschde Johr.

Am Samsdaag moje hänn wie immer die Kernerbankfraue vunn de "Flomerschummer Zwiwwelböck" mit ehre männliche Helfer denn Blatz um de Zwiwwelbrunne in e gemietliches Eggel verzaubert. Disch unn Bänk hänn se uffgschdellt, die Pergola mit blaue Plane umhüllt, Lichterkedde gschbannt, glääne Brodbeitel hieghängt, rosane Dischdegge uffgelegt, Nussbaamblädder liebevoll dekoriert unn als Hauptaddrakzion de Kannischder mim neie Woi uffgebaut. Zum Gligg hännse dragedenkt, vorher schunn rechtzeidisch guudes Wedder zu beschdelle. Noochdem alle Voraussetzunge obdimaal erfüllt waren, sinn dann am Nure fünfe die erschde "Mit-Feschdler" oigedroffe. In de Mitte waren zwää Disch vorbereitet, ferr alle mitgebroschde Köstlichkeide auszubreide. Wiesgewidder warn se voll unn enn dritde Disch hott noch härgemisst. Isch kann eich saage, der war ah glei voll. Am Schluss war dess ganze e großes Büffee, dess sogar de "Blaue Ent" vunn de Schdadthall zur Ehre gereicht hett. Bohnesupp, Dampnude, Schinkeblade, Keese-Schieße, Elwedritsche-Knodde, etliche Schwarzbrodsordde, Gequellde, franzeesischie Fischsubb, gfillde Frikadelle, Eiersalat, oigelegte Handkees, Lewwer- unn Grieweworscht, Schwaardemaage, weiße Knowlochkees mit unn ohne Scampies, Meloneschiffelscher mit Schinke, Schoofskees, blaue Woidrauwe, dambende Lääwkerkes, Grummbeersalaad, Nudelsalaad, Grieweschmalz, Olive unn Pepperoni, saure Gummre, Zwiwwle, Bagett, Weck unn frische Brezzle, Popkorn, Waalniss, Obatzder - unn 's schännschde war, dass jeder vunn Allem esse gekännt hott - blooß Zwiwwelkuche hott dessjohr känner debei ghatt.

Die Sunn hott gschdraht, die Leit hänn gschlämmt wie die Wäldmäschder, de Neie iss geloffe unn merr hott gschlawwert bis in die Nacht - schänner hetts nit soi kenne. Do hott merr mool widder Leit gedroffe, die merr schunn lang nimmi gsehe ghatt hott, hott Neischkeide erfahre, Termine vereinbart unn zwischedrinn immer mool widder wass gesse unn gedrunke.

Schbeeder hänn die farwische Lichderkedde dess Ganze in e behagliches Licht gedunkt, de Zwiwwelbrunne hott geblätschert unn de "Neie" hott soi Wirkung gezeigt. Die Tembraduur an demm lauschige Schbeetsummerowend

war agenehm unn so sinn die Leit hoggegebliwwe unn die Subbehäwwe hänn bis Middernacht gedambt. Korz gsaat: 's war mool widder sau-gemiedlich. Eigentlich isses schaad, dass als so wennisch Leid vunn demm schääne, hausgemachte Feschdel wass wissen. Am Schluss hänn die ledschde paar vunn uns Männer ausgemacht, dass sich am negschde Moje am Neune widder do dreffen, um alle Verwieschdunge zu beseidische. Dess hämmer dann ah tatsächlich gemacht. Am halwer Elfe war merr schunn ferdisch unn wolden grad de ledschde Disch ins Audo schaffe, do sinn die Fraue uffgetaucht. Unn die warn nit ohne, nä, die hänn Kaffee debei ghatt, frische Weck, Kuche unn Härnscher, Brod, Budder, Marmelaad unn alles, wass merr zum Kaffedrinke braucht. Unn schunn hämmer widder doghoggt, grad so, als weer merr garnit dehääm gewässst. Unser beladene Disch hänn im Schadde gschdanne unn langsam sinn uns die Fieß unn die Kniescheiwe oigfrore. Do hämmer beschlosse, denn ganze Schambes in die Sunn zu draage. De Millers Rolf hott zwar e bissel gemault, meer hänns dann awwer doch gemacht. Do hodder gsaat: „Kummt merr jo noochher känner uff die Idee, dass isch enn Sunneschirm beischlääfe soll!“. Denn hett merr dann awwer fascht brauche känne, weil merr nämlich noch bis Middags am zwää do ghoggt unn verzehlt unn gelacht hänn. Do hott sich mool widder beschdädischt: Die zufällische Begegnunge sinn oft die schännschde, drumm soll merr die Feschde feire, wie se ähm grad iwwerfallen.

Walter Rupp

---

## Hallo Ehr lieve Flomerschummer!

Moi Kusine, die Christl Müller, schiggt meer jedesmool Eier schäh Hefdche "Flomerschummer Gebabbel". Isch hab immer enn große Schbass, wann ischs lääs. Isch bin die Iris, die Kusine vunn alle Wirths, die bei Eisch mitmachen unn e Enkelche vunns Wirthe aus de Kärchegass unn isch hab do ah mool e glää Gschichdel ferr Eisch:

Die Mudder unn de Vadder aus de Kärchegass hänn immer Haase ghatt. Weil dess mit dem Fudder nit so äfach war, hänn meer in Frankedahl (meer hänn Richtung Boinderschemm gewohnt) im Feld unn am Schdroßeresch Eierpisch gschdoche. Die Christl war viel bei uns unn meer zwää hänn die Sägg nooch Flomerschemm gfare. Meer hänn dehääm zwää Fahrräder ghatt: Enn ganz alde Bogg mit Gsundheitslenker unn ausziehbarem Gepäggdrääger unn noch e ganz modernes. Isch war schneller wie die Christl unn habs schääne Rad verwischt. Die Christl hott e bissel gemault unn moi Mudder hott gschlicht unn gsaat, dess negschde mool werdd gedauschd. Meer sinn also losgfare unn immer wann uns Leit entgäje kumme sinn, bin isch e Schdiggel vorgsaust, weil meer dess alde Fahrrad mit demm riesische Doppelzentnersagg peinlich war. Uff de Flomerschummer Schossee sinn uns widder e paar Buuwe entgäjekumme unn isch bin glei widder in die Pedale gschdiehe, weil isch misch gschämmt hab, mit demm alde Schinner. Wie isch dann so ziemlich uff gleicher Höh mit denne junge Kerl war, do ruft vunn hinne die Christel ganz laut:

**"Du brauchschd garnit so vornenaus zu renne, die wissen sowieso,  
dass dess doi Fahrrad iss, uff demm isch hogg!!!"**

Do hett isch se erwürge kenne! Awwer wammer uns  
dreffen, verzehe merr heit noch devunn  
unn lachen uns halwer schäbb.



Do fallt merr jo äwe grad noch e Gschischtl oi:

Wie de Holdsche noch enn glääner Fregger war, hänn die Christl unn isch oft uffen  
uffbasse misse. Unn wammer wass annres vorghatt hänn, hämmer de glää  
Holdsche zwische uns genumme, hännen an de Äärmcher gschnabbt unn  
hochghowe unn sinn middem 's Gassel nunnergewetzt. Die Bääscher vumm  
Holdsche sinn in de Luft mitgschbrunge bis meer vor Lache nimmi gekennt hänn.  
's Holdsche hott vor Zorn gegrische unn dann hodden die Dande Heddel widder  
roigholt. Unn meer hänn dann widder kånne mache, was merr wollden. Schoinbar  
hott 's em Holdsche nix gschaad, wie er jo in Eire Hefdcher beweist!

*Viel Griëß vunn de Iris Adam, geb: Ehrhart, aus Kerchem-Bolande*



Die Flomerschummer Arweitsgemeinschaft bedankt sich widder  
recht herzlich ferr denn **koschdenlose** Drugg bei de Firma

***DREHER-DRUCK***

**MIKROFILM-CONSULT GMBH**

Hannongstr. 27, 67227 Frankenthal

Tel- (06233)27242 - Fax (06233)27552

Gsamtschdaldung Walter Rupp, Rädselseide Reinhold Wirth  
Red. Arweidsgreis "Flomerschummer Gebabbel" - im Mai 1999